



Broj: 05/1-50-13-26-42-4/18  
Sarajevo, 22. 2. 2018. godine

## IZVJEŠTAJ

### **sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Granične policije BiH**

Sastanak je održan 25.1.2018., s početkom u 11 sati, u prostorijama Granične policije BiH u Sarajevu. Prisustvovali su: Zoran Galić, direktor Granične policije BiH, Slobodan Krstić, pomoćnik direktora za organizaciju i operacije, Tatjana Klječanin-Martić, predsjednica Nezavisnog odbora, Enes Obralića, prvi zamjenik predsjednice Nezavisnog odbora, i Nikola Džambas, član Nezavisnog odbora, te Ivana Lovrić, sekretarka Nezavisnog odbora.

Direktor Granične policije BiH Zoran Galić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Tatjana Klječanin-Martić, predsjednica Nezavisnog odbora, kratko je obrazložila razlog posjete. Rekla je da je posjeta organizirana u skladu sa zaključkom s 40. sjednice Nezavisnog odbora i redovnim planskim aktivnostima Nezavisnog odbora, s ciljem održavanja kontinuiteta saradnje s policijskim agencijama iz svoje nadležnosti.

Direktor Granične policije na početku razgovora istakao je da je Granična policija BiH formirana 2000. godine, s posebnim ciljem nadzora i kontrole elemenata sigurnosti granične linije s posebnim osvrtom na kontrolu prelaska te granične linije. Granična policija BiH pokriva graničnu liniju u dužini oko 1670 km, a od toga je samo 1003 km s Evropskom unijom i tu ostvaruju usku i dobru saradnju s Republikom Hrvatskom.

Kada je u pitanju sigurnost granične linije, direktor je istakao da je Granična policija BiH u značajnoj mjeri sve svoje resurse i kapacitete usmjerila u zaštitu državne granice po pitanju ilegalne migracije gdje su suočeni s velikim pritiskom, a zajedno sa Službom za poslove sa strancima. Istakao je da je samo od početka ove godine spriječen ulazak za oko 80 ilegalnih migranata, te da su bili primorani prebaciti određene resurse, specijalne jedinice Granične policije BiH na kritične tačke gdje se pokušavaju spriječiti ilegalni ulasci, a što iziskuje dodatna finansijska sredstva potrebna za njihov rad. Također, direktor je istakao da po ovom

pitanju imaju izuzetno dobru saradnju s kolegama iz Ministarstva unutrašnjih poslova Republike Srbije.

Direktor je naglasio i da su u proteklom periodu učestvovali u dvije međunarodne akcije gdje su pohvaljeni od SELEC-a kao druga najuspješnija policijska agencija odnosno država po pitanju operativnih aktivnosti u borbi protiv organiziranog prekograničnog kriminala. Također, imaju vrlo zapažene rezultate kada je u pitanju zapljena određene količine oružja i naoružanja te opijata.

Što se tiče nacionalne zastupljenosti zaposlenih u Graničnoj policiji BiH, direktor je istakao da se o tome vodi računa, da se poštuje zakonska regulativa, da se tačno zna postotak konstitutivnih naroda i da se to poštuje prilikom prijema novih državnih službenika, namještenika, policijskih službenika pa i kadeta.

Direktor je istakao i to da Granična policija BiH 5 godina, do dolaska ovog menadžmenta, nije primala nove policijske službenike pa ih je u deficitu bilo oko 560. U međuvremenu su raspisana 3 konkursa za prijem, jedan je završen, a dva su u toku, kojim se pokušava smanjiti nedostatak policijskih službenika. Ono što svakako treba istaći je i to da je u 2017. godini Granična policija BiH ostala bez oko 100 dodatnih policijskih službenika koji su otišli zbog ispunjavanja zakonskih uslova za ostvarivanje prava na penziju (24 redovna i 72 vanredna penzionisanja). Tako da se i pored odobrenih zapošljavanja i dalje značajno osjeti nedostatak zaposlenih u Graničnoj policiji BiH.

Veliki dugogodišnji problem Granične policije BiH, istakao je direktor, jeste i nedostatak policijskih službenika na terenu, posebno na području Trebinja i Kantona 10, a što bi se moglo prevazići novim Zakonom o policijskim službenicima BiH kojim se predviđa eksterni premještaj policijskih službenika unutar policijskih agencija. Također, problem predstavlja i nedostatak sredstava za tehničko, odnosno senzorsko pokrivanje određenog područja, a koje bi zamijenilo nedostatak policijskih službenika na terenu.

Dalje kroz razgovor direktor je naglasio da ima korektnu saradnju s drugim policijskim agencijama u BiH, ali da bi ona mogla biti još bolja, te smatra da bi rukovodioci policijskih agencija na državnom nivou zajedno s Tužilaštvom BiH morali bar jednom u tri mjeseca održati zajednički sastanak, a sve s ciljem da cjelokupni ambijent sigurnosti na državnom nivou bude zadovoljavajući. Također, veoma dobra saradnja je i s kolegama iz zemalja regiona (Srbija, Hrvatska i Crna Gora). Granična policija BiH u odnosu na zemlje u regionu ima najbolji status i položaj, a prilog toj tvrdnji direktor je istakao da je Granična policija BiH

jedina policijska agencija koja je po određenim zakonima BiH samostalna u svom radu i u operativnom i u finansijskom smislu.

Direktor je naglasio da Granična policija BiH unutar svojih jedinica ima antibombni tim osposobljen i opremljen da odgovori izazovima kada je riječ o teškim minsko-eksplozivnim sredstvima.

Što se tiče terenskih ureda, direktor Galić posebno je naglasio veliki problem u Grahovu, Čapljini i Gradišci jer borave u iznajmljenim prostorijama za koje plaćaju veliku zakupninu.

Članovi Nezavisnog odbora na kraju su naglasili da će Nezavisni odbor i dalje, u okviru svojih nadležnosti, pružati podršku radu Granične policije BiH i poželjeli im mnogo uspjeha.

Sastanak je završen u 12,30 sati.

**PREDSJEDNICA  
NEZAVISNOG ODBORA**

Tatjana Klječanin-Martić